

四庫全書

史部

欽定四庫全書

史部

平定金川方畧卷八至十一

詳校官編修_臣曹振鏞

編修_臣裴謙覆勘

總校官知縣_臣繆琪

校對官學正_臣李巖

謄錄監生_臣于希賢

欽定四庫全書

平定金川方略卷八

六月己巳張廣泗奏言臣調集大兵分派十路

定期五月初八日進攻今據署重慶鎮任舉候

補叅將王愷報稱五月初七日自牛廠起程天

降大雪行至素可呢雪山駐劄初八日剷雪開

路本日未刻官兵過撒烏山於昔嶺東楚適市

地方駐劄派漢土兵五百名據住山梁取奪賊

卡任舉等即於十二日直抵昔嶺山梁佔踞險
要山北二里許地名木岡孤峯壁立為昔嶺一
帶賊碉及納喇溝二處總路賊酋於隘口連設
大卡數處並砌石城與官兵營壘相對十三日
晚官軍暗發士兵八百名順溝而下一面令官
兵攻擊木岡之山卡遙為聲勢賊眾紛紛上山
救護任舉等於山梁連發十餘砲穿過賊卡賊
皆奔竄潛踪十五日早遙見昔嶺山下及卡撒

右梁溝內烟霧迷天據報稱係前發土兵已將
石達喇第等四碉燒燬擒獲賊番男婦二十餘
人擊斃十餘人十五日密派官兵由山溝抄襲
山梁中腰賊卡是夜大雨如注聞鎗砲吶喊之
聲不絕據守備孟珏報稱我兵已上中峯奪據
山梁襲取木岡迤西中腰賊卡五處生擒賊番
五名殺傷者不計其數乘勝又奪得賊卡二處
軍威正振隨遣漢土官兵一千名直逼昔嶺中

峯駐劄任舉等於十七日督率官兵乘勢攻擊木岡寨其寨較之中峯賊卡倍為高峻官兵奮勇直前用鈎鑣鎗矛刺死賊番十餘人烏鎗斃賊甚衆目擊官兵人人奮勇爭先竟至舍棄挨牌挺身直入賊番鎗石交下恐有疎失暫時鳴金收兵千總金悅陣亡並漢土兵十七名又據副將唐開中高宗瑾劉德成等報稱奉委領兵先往左溝箐內埋伏飭令遊擊劉奇偉守備賴

君輔等帶兵於五月初八日五鼓搶過山梁割
營並發兵攻擊雙礮大銅砲力猛已將雙礮攻
塌無如雙礮之下復有二礮二礮之下更有砲
臺聯絡色底層壘堅險官兵奮勇擊死賊番數
十隨即填壕上礮因賊施鎗如雨弁兵不無傷
亡隨傳令不得上礮俱伏於礮外攻擊未時以
後大雨如注直至十一日方止隨於二十五
等日派遣漢土官兵圍攻谷里大戰礮將頭道

右山梁一帶撲毀焚燒戰礮大礮各攻克三四座不等又克右山大礮三座尚有大賊目阿什則太太雙礮小礮未克至於谷里大戰礮一座其前又有平礮三間自十五至十八日官兵圍守四晝夜十九日四更有光多木打一帶賊皆前赴救援礮內之賊亦乘夜出礮以死拒戰漢土官兵一面截擊一面搶奪戰礮殺賊三人帶傷約十餘人餘衆奔逸黑夜未便追擊現在撥

兵據守谷里碕以通右山梁糧運至右山雙碕
並上下左右小碕必須奪取方可進攻色底已
派遊擊韓樞帶兵二千前往右山分駐扼要一
面攻擊雙碕一面接應昔嶺又派遊擊呂文魁
都司郭號宗守備趙自超林昭馬國材等帶兵
九百攻取達雜兒腰賊人連夜建立木城踞險
拒守二十一日漢土官兵協力奮勇攻至中末
四卡皆獲小金川頭人卡卡策旺身先躍進木

城連砍數賊生擒逆酋用事喇嘛一名開姑什
牙並凶番一名鎗砲擊死賊番百餘名達雜兒
腰已經攻克斬獲首級九顆現令遊擊韓樞土
舍良爾吉帶領漢土兵一千七百餘名過右山
梁攻取雙碕又據松潘鎮總兵哈攀龍呈稱叅
將買國良都司馬光祖等於五月初十日駐營
梭羅岡離賊番雪山頂第一要卡約四十餘里
已刻領兵撲上山頂見左梁任舉官兵已在彼

割營我兵直至山梁之下割營候補副將劉忠
五月初十日領兵抵撒雪山佔據山梁於十三
日派外委馬世年帶兵於右山壓梁劉忠由半
山坡松林溝口一路躡探高阜處所聽候指派
進攻至牛廠地方松林內突出賊番約三百餘
人放鎗迎敵我兵奮勇直撲擊死番衆四十餘
名帶傷者甚衆賊俱奔入松林逃竄外委劉記
印陣亡並沃日土兵一名十五日哈攀龍會同

劉忠買國良分兵進勦馬溝右梁下營親身跼
看當溝中間有石砌牛圈二座可容百餘人左
梁半山至溝底松樹叢密右山之樹更為交雜
約有四十餘里方能出箐憑視之頃逆番四出
隨令官兵分據險要定設卡倫遣兵於十六日
搜截松林都司馬光祖前赴溝口拆毀松卡二
座過左梁山溝賊番約有三四十人藏伏官兵
即施放大砲右梁之兵將至林邊賊俱往溝下

奔逃右梁官兵乘勢追逐擊死賊番十數人因
樹木茂遂收兵暫駐又據加銜提督岳鍾琪報
稱奉派統領黨壩一路官兵進勦因天雨阻遲
至十五日派遣官兵二千名三路進攻康八達
親帶叅將張豹領兵於高阜處督戰其第二路
遊擊路建翰所領攻擊頭卡之兵遇賊迎敵官
兵鎗箭齊發斃賊甚多賊遂敗逃入卡千總楊
清興楊自功把總李養堃外委火大興周都等

奮勇登卡與賊短兵相接路建翰及遊擊王三元守備柴生花亦相繼登卡壕內所伏之賊從傍衝擊路建翰等又分兵截殺楊清興李養葵帶兵三十餘名躍入壕內與賊死戰殺賊甚多餘賊棄卡敗逃楊清興李養葵鎗傷陣亡而躍入壕內之兵亦多半傷亡第一路遊擊王三元等所領之兵行至戰碕不遠為壕所阻隨下山梁衝入頭卡接應惟第三路所派攻擊二卡之

雜後土兵道路稍遠行走亦遲為賊所阻未能前進至陡物黨嚙左邊山梁之下切近賊人水泉有賊修理卡塹經住劄作固山梁之副將鐵景祐用砲遙擊致死賊番一名現在布置奪賊泉卡並襲取陡物黨嚙又據岳鍾琪報稱署副將王世泰與副將劉順高雄所領官兵進攻甲索乃當二路於五月十六日派遊擊保懷智攻擊來當馬牙岡後山梁遊擊羅于朝攻擊上下

日旁山副將劉順攻擊馬牙岡山梁副將高雄
攻擊囊得礪寨署副將王世泰攻擊俄北賊卡
遊擊張玉成留守甲索軍營兵鍾琪現在派撥
阿壩及十二部落土兵赴日傍山運糧協助又
據叅將永柱呈稱奉派統領馬奈官兵進勦隨
會同遊擊李璠妥商於林噶及駱駝溝等處要
隘酌留官兵防守其餘抽撥漢土兵一千餘名
擬於五月二十二日由卡卡脚之東山江口進

攻其遊擊楊之義都司苟興副將董撫遠原派
統領正地一路官兵因甫經前往二十以外方
抵該處尚未報到進攻情形署遊擊潘文郁等
所領納貝山一路官兵原係牽制之師須俟卡
撒之色底攻克方可飭令前進臣查十路官兵
原擬五月初八日並進會勦不意陰雨連綿迄
今旬餘未霽山高路遠之處又降大雪以致阻
滯未能齊進臣現在飛檄督催惟是進攻之路

以昔嶺為最要而昔嶺一路現惟木岡一城與
中峯大戰礮一座未克倘攻奪此二處則可俯
瞰諸礮直搗刮耳崖較別路為甚捷總兵哈攀
龍一路既為松林所阻因將伊所領之兵改由
納喇溝前進即抄出昔嶺中峯之右與任舉之
兵會合並攻昔嶺俟克取之後再分路進勦勒
歪又前調雲南總兵冶大雄亦於五月二十日
抵臣軍營現已委令前赴卡撒總統滇黔官兵

一面進勦色底光多等寨一面抄出昔嶺中峯
之左與哈攀龍任舉之兵三面夾攻惟須先破
昔嶺戰碉則是扼吭拊背賊巢孤立無援矣茲
聞經畧大學士訥親已於五月二十一日自成
都起程指日可抵軍營臣再請商一切機宜經
畧駐劄小金川適中之地各路鎮將稟報情形
皆可隨時指示至卡撒昔嶺等緊要之處臣仍
不時親往督催轉飭各將士努力攻擊自必倍

加奮勵以期迅奏膚功也奏入

諭曰佇俟捷音以慰遠望

臣等謹按金川用兵往往以雨雪阻滯為虞
乃任舉攻取昔嶺於烟霧迷天之際土兵奮
勇連燬四碉擒殺賊衆又於大雨如注之夜
鎗砲吶喊之聲不絕於耳竟能直上中峯奪
取山梁擊賊甚多軍威頗振可知兵以氣勢
為用氣盛則風雷不能奪而鼓舞士氣又在

主將之行事合機宜而風采可畏愛也

七月辛卯

上命原任昭通鎮總兵董芳前往金川軍營聽經略
大學士訥親等委用遇有總兵缺出即行題補
壬辰訥親張廣泗會奏言五月初八日會期進
兵以來臣張廣泗已將各路呈報攻戰情形具
奏茲據由納喇調赴背嶺之署鎮哈攀龍報稱
五月二十九日率領副將劉忠叅將買國良至

昔嶺中峯署鎮任舉先於嶺上及嶺南對拒賊
卡劄營哈攀龍等見嶺北溝梁名渴足嶺礮寨
密峙令該將於三十日四更起營哈攀龍帶兵
督後初一日黎明鼓勇上梁賊番鎗聲四發官
兵下山對敵賊俱逃竄奪獲礮寨四座初二日
有賊百餘乘夜圍攻被官兵迎拒鎗傷多賊陣
亡土兵二名是日該協將令署守備鍾世俊由
正嶺直下守備劉斌由左溝圍繞殺傷二十餘

賊奪獲木城一座沃日土兵殺獲賊首一顆陣
亡漢土兵三名賊又於溝林砌卡斷我水道官
兵隨即添卡拒守初八日賊復乘夜從後山梁
來攻水卡官兵用鎗殺賊二十餘人賊旋敗走
陣亡土兵三名初十日三更把總陳琳領兵抄
出溝口截石溝一帶攻賊之左叅將買國良領
兵進取奎角援礮賊既發鎗督兵三而夾攻自
辰至巳賊棄礮逃遁焚礮三座賊復冒火飛撲

官兵用鎗砲殺傷甚多叅將賈國良手斃賊二
名餘俱潰散把總陳琳陣亡並漢土兵六名又
據昔嶺一路之署鎮任舉叅將王愷報稱移營
高阜用砲攻擊木岡木石城俱已擊塌賊乘夜
補葺官兵亦乘夜施放鎗砲五六晝夜不息五
月二十三日潛發土兵一百五十名攻奪賊卡
漢兵一百名埋伏邀截石梁卡路令東峯官兵
遙作撲攻右卡之勢夜間用砲上擊令土兵俯

伏蛇行躡近木城用挨牌遮護多帶乾柴以備
焚燒之用不意是夜大雨如注火繩盡濕伏兵
無援雖奮勇爭先為亂石所傷未能克復二十
六日任舉親抵昔嶺閱視營盤之左有得思東
木達溝乃卡撒昔嶺兩路軍聲糧路攸關為此
數礮所阻商同卡撒總統治大雄於二十八日
五更發兵焚燒木達溝一帶賊礮任舉至中峯
調度將得思東大礮三座圍困斷其水道用斧

進砍賊番滾崖逃遁得踞大碉一座小碉二座
乘勢攻奪得踞木達碉以上三處共攻克大小
戰碉十座石城一座大小平碉一百三十餘間
青稞麥豆田地約六十餘頃六月初九日攻克
昔嶺溝底石城水卡初十日會同副將唐開中
攻色爾力半山賊卡自三更交戰至五更土兵
奮勇撲攻奪獲木城大卡一座殺賊八名生擒
一名又據任舉等報稱六月十三日會同哈攀

龍唐開中令各兵砍木豎城步步為營十四日
分兵三路哈攀龍由右面架梁堵禦買國良由
左溝穿林而上以攻木城任舉唐開中由中直
撲石城卯刻買國良率領土兵上嶺漢兵繼進
木城左右賊番齊出夾攻買國良手斃賊一名
督兵力戰木城內矢石如雨鎗砲交加買國良
被鎗陣亡並把總馬良甫及漢土兵二十餘名
哈攀龍督兵上梁奪回買國良之尸及失去砲

位殺賊百餘收兵回營又據哈攀龍報稱六月十五日任舉唐開中攻石城東面哈攀龍攻南面又派土兵一百繞山攻西面又派土兵三百伏林堵禦十六日黎明齊進各鎮將皆身自督戰唐開中劉奇偉俱被鎗傷土兵奮勇有數人撲入賊卡者石城堅固異常官兵環繞木柵任舉督催兵力益奮西南林內突出賊三百餘人任舉率兵堵禦被傷督戰益力復被鎗傷陣亡

哈攀龍督兵分赴上下林中用鎗擊死賊人三十餘名收回任舉之尸隨令收兵二十日令土兵於賊城南面連劄數卡石城賊出爭為小金川土兵預伏邀截致斃賊目得以劄卡土兵三名陣亡又據卡撒一路之總兵治大雄報稱五月二十七日令副將高宗瑾攻雙礪前治大雄率唐開中劉德成楊朝棟夾攻礪旁未倒次日加兵進攻見任舉帶昔嶺土兵沿梁撲下往攻

木達治大雄同唐開中分兵前赴接應又令遊擊韓樞從右山夾攻昔嶺兵威益振二十九日派兵四路圍困光多三寨連燒三座賊死甚多又會合昔嶺官兵往攻得思東寨至六月初九日夜派兵四百分左右翼抄出色底雙礮之外堵截賊援另派土兵撲礮雙礮賊番及巴郎木須賊番潛來救應為堵截官兵所衝擊又伏兵齊起鎗弩俱發連戰四陣賊番敗走堅礮未能

攻克官兵亦有傷亡又據黨壩一路提督岳鍾
琪報稱五月二十五日進改革什戎岡陡物黨
噶天雨連綿山坡陡滑各土兵不避風雨連夜
前趨天明遇賊土兵奮勇殺賊六名二十六日
立卡安砲於樹林稠密之處開路進取二十九
日派遊擊沙亮都司張宏範遊擊阿爾占等分
兵三路攻取第二水泉守備黃金玉山右翼樹
林內伏兵副將鐵景祐遊擊王珩帶兵接應遊

擊王三元進攻康八達都司孫良材進攻木耳
金岡左翼官兵奮勇攻卡奪取水泉鎗砲殺賊
甚多守備楊昆等督率土兵奪取石卡二道木
卡二處山梁一道即剗立營卡右翼官兵攻賊
大卡冒險直上賊憑高臨下鎗石如雨官兵用
砲殺賊十餘人把總王憲陣亡六月初二日康
八達巖前伏兵五六十人官兵鎗擊落巖二三
十人餘賊奔逃東溝內亦伏賊六七十人外委

馬得剛執矛札死一賊兵丁鎗砲魚發殺賊無數陣亡官兵一名又據甲索一路之副將王世泰報稱五月十八日帶兵進攻俄北行至頭卡見賊十數名督兵追擊賊俱退入三四道卡內派兵連發數砲碉堅不動因大雪收兵二十四日連設四卡攻戰至三十日陸續殺賊二十餘名六月初五日派兵各帶攜牌火砲伏於兩翼王世泰帶兵自下而上賊放鎗拒敵官兵大砲

擊穿賊卡十數洞有賊二百餘人迎戰官兵擊死賊二十餘人賊伏壕中官兵力撲又殺賊十餘人始行回營陣亡官兵四名又據甲索一路分攻日旁之遊擊羅于朝報稱五月十八日抵日旁攻賊賊儘力抵禦官兵自辰至未擊死賊番五名連克賊卡二處奪獲木城一座賊奔三卡攻撲未克二十一日分兵三疊魚貫攻擊漢兵奮勇已進石城止隔一壕綽斯甲土兵竟不

前進賊壕鎗砲齊發漢兵奮勇不退至三更復奪石城賊番鎗石抵禦兵傷甚多即令收兵又據岳鍾琪報稱五月十八日派往甲索乃當二路分攻囊得之副將高雄劉順於五月十八日進攻囊得至山梁安營松林突出賊番百餘直來堵截一面攻擊一而下營自己至申殺賊數名餘從林內逃遁陣亡漢兵一名二十一日派西寧兵架梁派甘肅兵從中進攻兩礮撲出賊

五百餘人對面交鋒殺賊四五十人帶傷五六
十人敗入碇內官兵撲奪燒燬小碇一處奪獲
蠻鎗一桿割取耳記一個寅夜未敢深入把總
郭士榮公守桓馬得龍陣亡又據乃當一路之
遊擊保懷智報稱六月初一日夜間賊兵三股
於營盤前後左右侵擾又一股直衝後營門鎗
石如雨督兵奮勇禦敵四更始退殺賊一名獲
長矛一桿又據馬奈一路之叅將永柱報稱自

五月二十二日進攻卡卡脚賊俱堅守不出至六月初四日派外委楊進孝帶兵於四更潛上近賊中礮之小石厓設伏永柱及外委曹元靈帶兵誘敵把總鐵中奇賈璞於伏兵對面山梁接應遊擊李璠督催千總劉起奉等四員各帶大砲安於北山守備金容阻截卡卡脚來路千總彭翹翼呂渭元等帶兵助陣皆黑夜山頂埋伏五鼓起火伏兵突發午後北山賊勢漸衆曹

元靈佯走中礮賊躍出遇伏擊死八人並殺紅
衣賊一名連奪四卡安兵把守陣亡漢土兵八
名十二日復攻中礮殺賊五名餘奔入坑陣亡
土兵二名十三日發兵潛伏山巖五鼓時李璠
督兵奪卡殺賊六名一帶山卡皆被官兵奪獲
安設連環卡倫十九處又據正地一路之副將
董撫遠報稱六月初四日官兵直抵正地閱看
東南山梁中有戰礮五座賊四五十名防守十

二日派撥漢土兵千名親督上坡安砲自本日
至十五日用砲攻擊尚未倒塌臣等身臨賊境
目擊戰勦情形熟商進搃要徑悉心籌度相機
指授務期乘時掃穴早奏膚功上紓

聖慮奏入

諭曰任舉深屬可惜有旨交部從優賜卹卽賞國良
等畢命疆場雖屬効力之誼而朕觀之實覺不忍
為之淚下亦有旨諭部將此旨先諭軍前將士知

之是日納親奏言臣奉

命來川於五月二十日抵成都將西南兩路糧運詢問撫臣紀山藩司倉德據稱現在逐日發運出口糧千餘石雇覓漢番夫役烏拉俱能照軍營限定之數輓運臣隨於次日自省赴營六月初三日至督臣張廣泗駐劄小金川美諾地方沿途經過西路糧臺有糧多壅積者即催趲辦理各路軍營已經運到者除日支之外可餘數日

或月餘口糧尚無兵食不繼之虞至於兵分十
路進勦現在已未前進及逆酋所恃碉寨木石
城卡未能攻奪情形與班第張廣泗備細講求
督臣即於初四日前赴卡撒臣留駐美諾就各
路鎮將一月以來所報情節逐一查閱分別獎
飭申明紀律飛檄通行即於初六日親赴卡撒
美溝軍營卡撒美溝係通刮耳崖賊巢正路上
年七月間我兵奪取空卡關即入金酋境內屯

駐其地離賊碉不及半里最為逼近初九日復同督臣前往昔嶺相度賊巢山勢嶺有數路皆可通刮耳崖惟是山陡箐密碉寨層層獨色爾力一梁其勢尚為平坦賊碉皆在梁旁梁上止有木石城卡數座若能攻克一而分兵牽制梁旁碉寨一而即可順梁而下此路較卡撒美溝正路乘高臨下甚為得勢詢據各番咸稱下至底溝去刮耳崖亦不過數里是以會商督臣將

哈攀龍王愷所領兩路官兵歸併昔嶺一路同
進合之臣等從前抽調添撥昔嶺兵丁共萬餘
名以足兵力而圖進取仍督令已到官兵攻擊
木石城卡經我兵奪據木城數座又攻石城賊
守甚固屢撲未下本月十六日署鎮任舉奮不
顧身前往督催致被鎗傷陣亡督臣聞報即日
親往指示調度現在逼攻務期必破再查我兵
可以進抵勒歪刮耳崖賊巢惟黨壩昔嶺卡撤

三路今黨壩昔嶺已均有重兵惟卡撒雖現駐兵三千餘名但護糧分防各處皆須撥用餘兵不足以資攻勦若另調新兵未免緩不及事莫若就中酌量有應牽制堵禦及彈壓土司之處量地酌留以備攻守將多餘之兵悉行抽調添併卡撒以重聲勢庶可進勦賊巢現與督臣會商辦理再臣與督臣又思賊番因險據碕故能以少禦衆今我兵既逼賊碕自當亦令築碕與

之共險兼示以築室反耕不滅不休之意賊番
自必搖動且守碉無須多人更可餘出漢土官
兵分布攻擊似亦因險用險之策已飭各官星
速修砌遵照逼攻總之就現在進勦情形今秋
能否告竣目下尚難預定惟有脩細籌商督率
將領激勸士卒倘能連奪數碉足以阻賊堅守
之心而長我勇往之氣勢成破竹剪滅不難矣
奏入

報聞是日

上命軍機大臣等傳諭曰據大學士納親奏報金川軍情及籌辦事宜有築碕與賊共險之策此事披閱再四不能解辦理之意自金川用兵以來駐軍卡撒久歷時日賊酋逆我願行傷及將士自當刻期撲滅以收犁庭掃穴之功今觀訥親等所奏情形尚費經理非旦夕可以竣事但攻守異用彼之築碕原以自守我兵自應決策前進奮力攻取乃

轉令攻碇之人效彼築碇是亦將為株守之計耶
且碇不固則不足恃碇固則必勞衆力若以築碇
之力移之攻取破彼之碇以奪其所恃不亦可乎
在訥親等或自別有籌畫而奏內殊未明晰以朕
度之或因慮及山深箐密入秋難期克捷預為退
駐之地耶訥親等恐未必籌及於此即使有見及
此亦非萬全之策蓋能克其碇而守之猶屬因利
乘便之意今因彼守險我亦築碇微特勞費加倍

且我兵已深入賊境地利氣候素不相習而守礮
勢須留兵多則饋運難繼少則單弱堪虞賊僧凶
狡必狃我以持久出我之不意浮寄孤懸主客之
形既別情見勢絀反覆之慮尤深師老財匱長此
安窮不可不熟計也况將來金川撲滅之後其地
不過仍歸之番是今勞師動衆反為助番建礮之
舉恐貽笑於國人躍冶於番部矣昨覽此摺即以
為不然思之竟夜益覺其非策不如速罷為宜再

朕閱另摺所奏任舉捐軀報國畢命疆場不禁為之泣下在伊等忠憤激發固已甘之如飴而朕以小醜跳梁用良臣於危地思之殊深憫惻雖經交部從優賜卹以慰忠魂而事後之慮彌切現在大學士訥親尚書班第內大臣傅爾丹總督張廣泗提督岳鍾琪等立營漸逼賊巢凡有進止更當因時度勢鄭重籌辦不宜徒事奮往以厯朕懷至所調綠旗兵丁或未能勁健可否另調滿洲及索倫

兵着傳諭大學士訥親酌量具摺覆奏朕觀金川
竟難措置設其易處則張廣泗久歷戎行之人早
已成功矣今訥親雖為經畧只宜持其大綱督令
張廣泗等各施謀猷以圖速奏膚功即如建碕之
策率皆不中肯綮而張廣泗亦附和而無語可見
彼有推諉之意矣殊增朕憂訥親不可不知也此
事速行回奏並將近日情形一併奏聞

臣等謹按張廣泗居心忮忌恃才傲忽初至

軍營藐視金川之衆率意而行無慎重周詳之識既而張興失陷徒懷慙憤更乏成筭及聞經畧蒞師固有藉其聲威冀幸成功之意而訥親茫無方畧已為張廣泗所輕於是轉幸分謗之有人不以破敵為已任推諉之心聖明早已燭照於萬里之外矣

是日訥親張廣泗會奏言現在領兵鎮將如任舉買國良俱已陣沒唐開中又受鎗傷治大雄

現患傷寒一時統領乏員因思及原任固原提督段起賢籍隸成都丁憂家居副將胡大勇素稱勇往臣等公同商酌俱已飛檄行調又因遊擊劉奇偉都司王一柱受傷調養亦經移咨雲貴總督揀派勇幹歷練將備二三員兼程來營以資委用合行奏

聞伏思將領為士卒表率必須統領得人發縱指示方足以勵士氣而奏膚功今軍營各路將領攻

勦機宜既屬未諳魚之才智俱係中平即指授之頃尚有不能領會者臣等既無素稔可用之員仰懇

皇上天恩飭查與川省稍近各省曾經保舉之鎮協叅遊內

簡發十數員馳驛來營臣等派遣委用奏入

上諭內閣曰古州總兵哈尚德湖廣叅將哈峻德雲南提標叅將高欽延安叅將陳文鎮海叅將孟麟

雲南遊擊魯文德朱璣范崇純湖北遊擊馬能陝
西遊擊馬雲翔直隸遊擊吳士勝着該部即速行
文調赴金川軍營聽候經畧大學士訥親等委用
是日訥親又奏言欽奉

諭旨令臣將現在征勦情形密奏臣查各路官兵不
能前進者多惟昔嶺一路雖現為石城所阻度
我兵力尚可望其不日進取惟是臣與督臣到
營未久戰勦機宜督辦伊始且各路抽調官兵

尚未到齊容臣一面指示辦理一面相度籌畫俟月餘後如果我兵已全力攻勦猶有不能速捷情形再行妥議密奏請

旨裁奪奏入

諭曰卿意遲待數日一舉成功何等慶快殊未憶及朕之懸望耳及至奏到仍不過如是且聞任舉凶問不勝感惜何能慰朕耶又

諭曰張廣泗去歲奏張興之事措辭得體今任舉乃

捐軀致命者而汝等不過奏聞其事亦未詳悉殊不知輕重也是日訥親又奏言內大臣班第等帶領侍衛拜唐阿等於六月初三等日陸續抵小金川軍營臣就現在用兵要路籌度分為四路昔嶺一路派內大臣班第黨壩一路派護軍統領法酬甲索一路派護軍統領薩音圖馬奈一路派護軍統領烏爾登前往督兵攻戰其侍衛官員拜唐阿等亦於附近各路分派飭令照看

督率臣自成都起程挑選成都滿兵百名帶往
今已抵軍營即將此兵分給四路大臣侍衛等
內大臣傅爾丹於六月十四日已抵臣現住之
卡撒軍營緣亦係進勦要徑即將伊留住卡撒
各路大臣侍衛內班第報稱於昔嶺督視攻戰
漸行前進樹立木柵烏爾登報稱在馬奈督視
攻戰奪賊四卡其餘別路尚未報到至各土司
效力行間輓運米石者臣已遵

旨宣布

皇恩將伊等每年賦額并從前加賞土司之例行查
巡撫藩司俟查覆到日再將應如何加

恩之處定議請

旨其督臣張廣泗所奏川省民夫幫貼銀兩一案撫
臣紀山已飭承辦此案之知府李威唐賈送檔
案來營備查俟該員到日再將有無情弊之處
清查奏

聞奏入

報聞是日班第奏言前因建昌道陳緯等辦糧誤遲
致甲索軍糈缺乏業經會摺糾叅一面飛飭川
東道齊格及瀘寧同知耿壽平前往子龍催趲
速運甲索一路最為遙遠近查黨壩至彼處渡
河而行不過三四日可到黨壩現積米四千儘
可分運隨飛咨總統岳鍾琪已據諭令綽斯甲
土兵暨餘丁人等沿河接遞兩次共運米六百

五十石又於該土司境內採辦炒麵糴粃以資
接濟其川東道齊格等亦飛調明正孔撒麻書
東科等處土司多方獎賞各出烏拉數百加給
雇值自五月以後共陸續起運米麵二千餘石
兵食已充可無匱缺又據該道等稟稱各土司
承認幫雇烏拉每日可運米五十石務使有贏
無縮惟至深秋大雪恐有阻運之虞臣即行令
黨壩糧務臨期量行酌撥以圖萬全又打箭爐

至甲索山險途長雨雪不時難免停阻因詳諭該道等查明路徑細察情形其應作何變通辦理之處現在會咨聽部核議奏入

報聞是日班第張廣泗紀山會奏言順慶府通判丁紀龍夔州府經歷蒲宏圖榮縣縣丞劉大釐管理臺運惟知利已罔恤夫艱臣等訪查丁紀龍管理熱籠正糧務凡給發軍裝夫價多有侵蝕班攔臺積米甚多丁紀龍身任督催並不顧問

現在另委忠州知州劉乃大前往料理丁紀龍
運米龍肋不催速到積票至二三十張不能交
納又內地雇募夫役頗為拮据丁紀龍於本站
內留積散夫最衆將額設交管之夫不令背米
以致枵腹難堪相率逃散運夫本應按期更換
丁紀龍勒令本站番夫長役以致紛紛稟訴至
於所管各站之斛大小不均運夫每多賠累蒲
宏圖管理班攔山糧務扣剋雲貴軍裝背夫脚

價該臺所管三站塘馬及安運馬騾俱經倒斃
既不買補亦不報明班攔山積米至三千餘石
蒲宏圖不善疏通倉底致有霉變至劉大麓管
理熟糴寨糧務擅於蠻地私自製秤稱米桿上
無星不能平準運夫前途交納往往賠累又劉
大麓將遂寧等縣解運官馬勒住私賣營利肥
己剋扣夫價種種劣蹟斷難姑容臣謹會摺糾
叅奏入

諭曰丁紀龍蒲宏圖劉大蘆俱着革職其誤運侵蝕
情由交與巡撫紀山嚴審定擬具奏

平定金川方略卷八

欽定四庫全書

平定金川方略卷九

七月癸巳

上諭內閣曰經畧大學士訥親等奏稱署總兵任舉
統兵進攻昔嶺石城身自督戰奮勇直前多所斬
獲乘勝追殺致被鎗傷陣亡任舉前在叅將任內
值固原兵變以單騎手刃亂兵解散賊黨捍禦全
城安撫百姓勞績已為懋著故特擢用副將命往

金川軍營領兵攻勦所向克敵現已補授總兵官
深望凱旋之日錄功優叙以獎殊勲孰知伊感朕
知遇奮勇捐軀深堪憫惻考諸典禮以死勤事者
祀之本朝特建昭忠祠用享疆場效命之臣任舉
著入祠從祀所有卹典照提督例給與該部察例
具奏伊子亦照提督例給與廕襲該部并行文調
取來京引見至買國良等著經略大學士訥親於
軍務告竣之日查明咨部一體從優賜卹

甲午

上命軍機大臣等傳諭訥親曰訥親昨奏到軍機一摺已詳悉頒發諭旨今再四思維所云建礮之策不惟有所難行抑且深為可慮將謂得尺則尺得寸則寸以此為自固之計獨不思礮樓非可易成即使能成而我兵究以攻取為事若再行前進其將再建一礮耶向後屢進不已策將安出且調集大兵本圖制勝今不用以克敵而用以建礮必非

所願以朕度之此旨未到之先勢將中止僅其意在必成究屬徒勞無益朕一見此摺即不以為然及問在京大臣等亦皆以為不可朕意張廣泗老於戎行豈有不知而亦隨聲附和在張廣泗未必不謂任事經年未著成效今既有經畧肩茲鉅任發謀決策經畧裁之是非得失經畧當之而彼得袖手旁觀遂其推諉之計如此則所係更大矣訥親不可不知此意況朕命經畧前往原以總挈大

綱以朕坐籌遙度於京師不如可信之大臣親履
行間察衆人之情就目前之勢相機指示據實入
告尤為親切此朕命訥親前往之本意也至宣猷
効力仍當責之張廣泗等使各盡其長即使朕親
行亦不過指揮調度而所重自在羣策羣力從來
耕當問奴織當問婢若論用兵熟練朕必不肯謂
訥親優於張廣泗即訥親亦必能知此蓋經畧統
領全軍衆人之謀皆其謀衆人之力皆其力豈必

自出所見方為已功耶而朕更有深慮者大兵聚
久變患易生在固原平居無事之時尚有一夫夜
呼倉猝四起之變何況軍中親信僅滿洲百數十
人其餘皆調發客兵及上司蠻卒本非世受深恩
為我心膺者比浮寄孤懸孰無室家鄉里之戀而
勞役不已奏凱無期版築方殷鋒銳莫展肘腋之
慮良可寒心在部曲士旅固不可不鼓其勇氣而
鋒鏑之下人孰甘心驅之太迫變計生焉儻有不

測豈不重貽西顧憂耶此所為反覆以思而食不甘味寢不安枕凡思慮所及不得不備細告之訥親使悉知之也金川之役本不容中止況任舉之歿失我大帥如其置之不問何以慰彼忠魂雪我衆憤但憤兵亦將畧所忌自宜因時度勢以為進止儻險地必不可爭或別有出奇制勝之善策如古所稱用間用術或致甘言或懸重購使彼有內潰之機然後可乘其敝從前王柔亦謂蠻夷易以

利動且彼醜類無多不惜厚費或可坐縛逆酋此亦不得已之思耳王柔何時能到軍前曾否建白及此可就近諮詢滬暑炎蒸瘴癘毒虐暴師日久無刻不勞軫念大學士起居善自愛護並傳諭軍中諸大臣將弁其各慎重

臣等謹按春秋傳曰王巡三軍拊而勉之三軍之士皆如挾纊宋太祖冬日諭侍臣曰吾居深宮尚苦寒若此況從征將士耶因解衣賜

王全斌仍語諸將士曰不能徧及也蓋上下之情貴乎相通上以慈祥惻怛之恩待其下則下必以忠義愛戴之誠報其上伏見

皇上身居九重慮周萬里以行師逾載時時厯念不特經畧大臣諭令善自愛護即軍前將弁無不慰勉諄摯

仁恩愷澤足令聞者感深肌髓矣

乙未

上命軍機大臣等傳諭班第曰金川運糧蠻夫腳價
每石約十餘金又日給炒麵一升所以體恤勞人
可謂優渥矣今聞川省每一州縣派夫六十名里
下科派津貼每夫一名竟至四五十金之多一夫
在途或有逃亡病故仍向本縣補派津貼亦復一
例重科里下從中侵蝕幾至窮鄉僻壤奇零小戶
亦皆騷擾不寧是居者追呼賸削既有典質稱貸
之累而行者離鄉背井仍不免於饑寒困苦之憂

以小民之脂膏徒飽里胥之谿壑以此推之則各土司所屬番夫亦未必能免派累無怪乎巴塘番民有不服派夫毀橋它路之事也金川軍務尚未告竣運糧之事勢難中止若不體察情形妥協料理民何以堪朕前因金川軍營止張廣泗一人故令班第暫留協助今既有大學士訥親提督岳鍾琪等則班第現無專辦之事可以暫回內地往來查察著於沿途即詳加體訪如朕所聞情形果否

如此一並妥協飭辦務期無悞軍糈無累民番始
為兩全是日

上又命軍機大臣等傳諭訥親張廣泗曰近覽訥親
所奏軍務情形似非一時可能就緒今大兵已深
入賊境設膚功不能立奏經秋涉冬彼地沍寒難
以久駐又不得不暫營和煖之地相時再舉深惟
久戍之卒一聞移撤心多渙散狡寇或從而躡其
後不可不慮將來移駐何地並如何撤回之處亦

當預為籌度萬全且大兵調集遠來自贍對之役
已經三載其附近土司俱應夫役亦已數年運餉
從征更多擾累近聞蜀省州縣派夫徵餉苦累農
民已傳諭尚書班第令其往來查察訥親可即令
前往並飭巡撫紀山速為查辦內地如此土司可
知恐其積勞懷怨別更生心而我軍孤懸賊境非
內地聲援聯絡者可比可傳諭訥親張廣泗咸悉
此意處處刻刻留心密切防範至朕命訥親經畧

原以總領大綱觀察情狀督率調度張廣泗本係
川省封疆大吏且統領全師二年于役凡軍務責
成朕惟張廣泗是寄目今歷練戎行嫻熟軍旅孰
有過於張廣泗者伊當竭誠効力經畫機宜不可
因大學士在營稍有推諉之心或存彼此之見現
令各路兵勢若何古之用兵制勝者曰觀釁曰攻
瑕賊衆所短何在何處有隙可乘訥親張廣泗在
營當有成算可詳悉奏聞是日

上以金川之役紀山首開事端乃坐鎮省城於軍務
既若置身事外而運糧一事復任里胥濫派中
飽民番俱累漫無覺察

命軍機大臣等傳旨申飭

臣等謹按金川糧運

皇上早頒諭旨令巡撫紀山給發價值務從寬裕乃
奉行不善致有津貼派累

皇上一聞陳奏

聖心注念不已屢

頒諭旨既嚴飭紀山復令班第回川查察務使無累
番民計慮既極周詳而愛民如子之誠尤為
臣下所當深體者矣

乙亥

上諭內閣曰我國家從前用兵以雲梯登城為要務
其時人思奮勇建功受賞延及子孫今承平日久
兵革不試旗人已不知有此藝矣朕思金酋恃其

碉樓險固正可用此破敵即使金川無所用之亦
滿洲武藝所當訓練者可於八旗前鋒護軍內上
三旗每旗派五十人下五旗每旗派三十人擇其
少壯勇健者演習雲梯以備遣用交與公哈達哈
查拉豐阿都統永興護軍統領慶泰副都統那穆
扎爾管領訓練并令來保傅恒那延泰汪扎爾更
番查閱俟學習有進朕亦往觀

壬寅

上命軍機大臣等傳諭訥親曰張廣泗將原任總兵馬良柱解送到京朕命軍機大臣等召問伊乘夜撤營遺失軍械情節據稱從前駐守曾達之時糧運為雪所阻已經半月士卒皆煮皮鎧鞍韉而食接到總督撤營檄丈人思更生砲位軍械因雪大不能搬運以致遺失馬良柱前於班滾之役扶同欺隱茲復臨陣退縮罪固難追但伊在川省二十餘年地方情形頗能熟悉即以進勦金川而論其

始領兵千餘在瓦寺松林口奮勇督戰遂解沃日之圍又收降小金川之衆克復孫克宗是伊在三鎮中尚為出力即班第前此亦經備細奏聞至其撤營一事據稱糧運被阻已經半月果爾則時日甚久兵丁何以自存恐屬狡飾之語如實係如此則馬良柱之倉皇拔營又當別論可傳旨詢問大學士訥親秉公確察不必問之張廣泗與班第彼時糧運是否為雪所阻已經半月之久將情由速

行奏聞儻所供屬實馬良柱年雖六旬有餘精力尚屬可用將來仍發往軍前立功贖罪或猶勝於新任苗疆之人也至訥親前次摺奏係七月初十日到京今又幾及半月並無具奏之事朕心日深盼望在訥親之意必係期於速捷以待奏報膚功但軍營事務朕切欲備悉其情形無論大功克成固宜迅速入告即或尚在酌辦亦當隨時奏聞以慰朕西顧之念嗣後著十數日一次繕摺具奏其

現在進勦事宜若何天時晴雨若何軍務既不能
中止本年儻未能即竣將來作何結局訥親等目
下作何籌畫可一并詳悉速奏朕近思我滿洲舊
有蟻附登城之技因承平日久未經演習今已特
派大臣挑選旗兵數百按期操練務令純熟並暫
留馬良柱在京令其度量賊碉形勢協同演習俟
訥親奏到再酌量發往軍前并諭知訥親將此項
技藝可否為攻擊碉樓之用即行奏聞

戊申御史王顯緒奏言川省土司與金川疆界
毘連者不一其處如果以番制番不難減此朝
食况番性貪悍慙忿甚易仰懇

皇上勅下經畧大學士將隣近金川之各土司無論
已未調赴軍前概行明白宣諭令其自統所部
土兵以為前驅官軍惟大張聲勢以為後援有
能搗破賊巢擒獲逆酋者即以金川土地人民
賜之將見各土司爭先恐後盡欲立功受賞伊

等言語衣服相同偵探往來亦便前驅之士兵
一得路徑破其險要大兵即可尾之而進且金
川賊衆見附近土司奮勇并力自度難以瓦全
又聞有破格之賞亦未必不自思求生之道縱
不擒其酋首縛獻軍前亦決不致如前此之出
死力以相拒矣奏入

上命軍機大臣等傳示訥親張廣泗是否有可採擇
以備一得之用或調伊父王系而加詢問詳悉

奏聞

臣等謹按以番攻番固兵家之常言即軍中亦未嘗不用此計乃我

皇上虛衷若谷延納維殷一聞陳奏即

命經畧等加之採擇初不以書生未諳軍務而忽棄之芻蕘之言聖人擇焉其是之謂歟

庚戌

上諭內閣曰金川逆酋不法現在調撥大兵刻期勦

減一切軍需供應絲毫不以累民惟是飛芻輓粟
烏拉之外間亦酌用民夫雖給與腳價口糧而小
民不免勞瘁朕心軫念著該督撫查明辦過夫米
各州縣將本年錢糧先行緩徵俟凱旋事竣之日
分別等次奏明請旨候朕加恩以示軫恤邊氓之
意是日

上又諭內閣曰大兵征勦金川各土司盡心出力始
終不懈朕曾傳諭經畧大學士訥親將効力戎行

供應烏拉輓運軍糧之各土司查明功績分別奏請候朕加恩今據覆奏各土司輓運軍糧雖按米給值而供應夫馬尚無貽誤且現在奉調協勦俱屬恭順請加賞賚朕念各土司轉運供應著有勞績雖協力攻勦尚未殄滅逆酋奏報全捷而從事行間應先行分別賞賚以示鼓勵但該土司等向來輸納貢賦多寡不同若免其稅糧人數難均未為允協其明正土司堅泰德昌等著加恩將軍營

所有充賞緞疋酌量分別賞給未經查明之長官司土千百戶等俟查明之日一體頒賞是日訥親張廣泗會奏言各路於六月二十六日以前攻克情形業經具奏茲查河西四路內正地馬奈二路俱報稱碉寨險竣難克甲索乃當二路月餘並未攻戰河東六路內除納貝一路原係牽制之師其美卧納喇二路已歸併昔嶺為一路是河東可以攻抵賊巢之兵止有黨壩昔嶺卡

撤三路今黨壩統領之提督岳鍾琪報稱所統之兵雖有萬餘漢兵除傷病外止存二千有奇餘皆雜糅等處土兵多屬怯懦若直抵勒歪必須添兵數千方可沿途布置則是亦未能即掃巢穴卡撒一路所檄調添併官兵現尚未到難以進攻昔嶺一路派兵已幾萬名乃自哈攀龍等統領以來二十餘日為賊卡所阻不能前進兼之卡撒右山梁賊碉已為我兵扎卡圍困數

日復被賊焚奪不能救回伏思漢土官兵四萬
餘名業已十倍賊衆乃今歲進攻旣逾兩月

臣

等親蒞軍營亦已月餘竭力運籌督率究未能
使將士共知鼓勵奮勇爭先以致各路毫無寸
進此皆臣等措置未當發蹤無方實深惶悚現
在可望深入直抵賊巢者惟昔嶺一路務期督
率將士奮勉効命一有前進即行飛速馳奏再
檄調之原任提督段起賢於本月初五日到營

已委令總統昔嶺固原等處官兵并暫署重慶
鎮印務奏入

報聞是日訥親張廣泗又會奏言松潘鎮哈攀龍統
領官兵原係由美卧溝一路進攻嗣因該處有
松林阻滯即經調赴昔嶺會合進攻因令酌委
幹員帶兵三百移營前赴美卧溝駐防乃哈攀
龍所委之千總黃世顯漫不經心復派外委羅
匡國帶兵三十名解運砲位以致六月二十二

日行抵松林口乾海子左山梁遇賊殺死兵丁
二名搶去劈山砲一位已屬大千軍紀及黃世
顯帶兵駐劄撒凹山脚該處尚存軍糧七百餘
石該員復任意玩忽毫無備禦以致六月二十
九日賊來侵犯殺傷官兵佔據糧石失去砲位
軍械該員退保墨石臣張廣泗聞知飛檄小金
川土司帶兵二百前往擊退賊衆止失去糧三
十一石似此怯懦疎失之武弁哈攀龍濫行遣

委咎已難辭且該鎮調赴昔嶺於任舉陣亡之
後不能督率士卒奮勇力攻藉稱欲建木柵方
可架砲攻擊延至二十餘日始將木柵建就亦
仍未能攻克賊卡是布置疎虞進攻延緩軍紀
攸關相應叅奏但查哈攀龍係限於才智尚非
有心貽誤其臨敵頗知勇往仰懇

聖恩將該鎮降級留任自必感激圖奮

臣

等隨時策

勵亦可資其効用是日訥親等又奏言卡撒右

梁雙礮必須先圖攻克方可再規進取前於五
月內派令副將高宗瑾帶兵逼礮駐劄攻擊旬
月以來徒傷弁兵究未能克嗣因副將唐開中
鎗傷其所統滇黔官兵需員管領暫令高宗瑾
前赴昔嶺接管與叅將劉策名共為經理攻勦
竟無一技可施及臣張廣泗分派小金川土兵
乘夜圍困雙礮絕賊水道而率領土兵之候補
守備馬國才不惟不能嚴加防範乘勢攻取反

被賊人於雙碶之下奪去小金川土兵所札木卡二處高宗瑾旣不應援劉策名又漫無調度而管領放卡漢兵之遊擊韓樞守備杜先俱擁兵坐視不為策應相應據實糾叅請

旨將高宗瑾韓樞杜先馬國才俱革職以肅軍紀並請仍留軍營差委効力至劉策名任事僅十餘日應暫行存記俟事竣核其功過奏入

上俱可其奏是日

上命軍機大臣等傳諭訥親張廣泗曰據奏金川進
兵情形並將總兵哈攀龍副將高宗瑾等分別糾
叅朕已照所請交部但此次辦理軍務似微有過
嚴之處夫軍行首重紀律固不得不嚴惟是嚴於
罰者亦當明於賞鼓舞人才之道又不得不少加
委曲假如同屬中平之材其十人中豈無二三人
畧勝者則就此二三人稍示優異以勵其餘又如
一人之身或功過相叅則當亟加賞賚以不沒其

功俾其感激鼓勵奮往直前冀蓋前愆如其再有過犯加以嚴處彼亦甘受無辭蓋從征將士身冒鋒鏑臨陣對敵驅之以性命相搏若不於賞罰之道神明其用甚至有罰而無賞兵丁等豈明大義未免寒心漸就怠惰或更隱含怨憤當此倥傯旁午之際少有變故所關匪細自金川用兵以來大小員弁以過受罰者多人而破格被賞者頗少似非鼓勵將士之道至摺內所稱此皆臣等措置未

當發蹤無方在伊等肩茲重任頓師日久其心固切欲進攻以期大捷而兵情地勢難易緩急之間亦當隨時酌度逆酋險碁林立一夫當關萬衆為之阻奪急於期效亦屬無益且恐欲速過甚未免轉有疎虞此又不可不審也再如割取耳記一事朕前恐行之未便是以交軍機處定議今據奏稱接到諭旨又行酌改用兵大事朝令夕更原非所宜朕於數千里外何能事事遙度悉中機要歷次

所降諭旨其能行者固當遵辦其或勢有難行或已發而未便復收亦不妨據實奏明總期歸於妥協此事既經改辦祇得照行但奮勇兵丁另當熟籌獎賞之法以示鼓勵建立碣樓一事所降之旨目下諒已接到此次摺內未見奏及或以勢難強行因而中止或照前摺尚在舉行情形究竟若何且入秋將近半月賊境雨雪漸繁將來作何行止朕日為廑念可一併具奏

臣等謹按賞罰為軍中機要所謂嚴者在紀律森然人不敢犯非吝賞之謂也訥親等意在急於期效故於諸將士但見其過不見其功實則賞罰不明欲速無益

聖明洞鑒已盡底蘊至謂十人之中豈無二三人稍勝者即一人之身功過相叅當先賞其功以鼓其氣指示明切曲盡人情若

聖諭所謂兵情地勢難易緩急之間皆當隨時酌度

誠至當不易之論也訥親初至軍營急切督戰以致任舉陣沒無功豈非難易緩急之間有失當乎

聖德謙冲謂數千里之外豈能事事遙度悉中機宜而實則

諭旨所頒燭照無遺洞中竅要惜乎在事諸臣之未能善體也

是日訥親奏言准兵部咨議覆陝西巡撫陳宏

謀請增驛站馬匹工料一案交臣定議臣查四川通省驛馬實有七百餘匹巡撫紀山因軍興額馬不敷差遣先後

題請加增經兵部覆准添馬七百二十餘匹現在馳送軍機文報可無貽誤陝省原設馬匹數目較之川省各驛請增之後尚多未便轉議加增以致徒糜

國帑奏入

報聞

辛亥

上諭內閣曰主事何曰熙隨往軍營近聞身故雖係患病究因公事前往與効力戎行相同自宜酌加恩卹其身後一切事務及起送回籍俱著大學士公訥親酌動公項量為料理賞卹

臣等謹按何曰熙隨往軍營職司文翰非有荷戈執戟之勞禦侮折衝之績乃

皇上念及從征即與効力戎行者相等

恩旨優渥體卹備至如此三軍之士聞之宜何如奮

勉激勸也

是日陳宏謀奏言准四川撫臣紀山咨軍前添
調官兵更增繁費前接准廷寄令於陝省封貯
銀內就近撥用當經咨請動撥銀二十萬兩解
川已經收明今當庫項匱乏之際請於陝省藩
庫內湊撥銀二三十萬兩委員兼程解川以濟

急需臣飛行布政使議稱酌留項下止存銀一
十萬餘兩不敷川省請撥之數今於酌留項內
動銀一十萬兩再於乾隆十三年春撥銀內借
動銀一十萬兩共銀二十萬兩即於七月十八
二十二等日委員解送四川撫臣紀山收明應
用奏入

上諭該部知之

閏七月癸丑紀山奏言金川節次添調官兵分

路進勦費用繁多前後題撥協餉究不敷用據
布政使倉德詳稱前後借項已逾百萬奉撥江
楚二省銀一百萬兩不足歸還借款今又奉檄
添兵則軍務之需費日繁而凱旋之遲速難定
加以辦理善後漢土兵丁歸裝坐糧以及獎賞
撫卹及松潘等路駐防臺站官兵更有歲需供
應合再詳請酌撥協川銀一百五十萬兩迅速
解川以資接濟奏入

上命該部速議旋經部議甘肅撥給銀十萬兩江西
撥給銀二十萬兩浙江撥給銀二十萬兩部庫
存貯銀內撥給一百萬兩共一百五十萬兩解
川應用

已未

上命軍機大臣等傳諭訥親曰解任總兵馬良柱稱
軍械內火箭最為有用伊從前曾稟明張廣泗製
備火箭五千枝謀焚賊酋積貯原稟並未批發賊

酋糧食俱安置礮樓之上火箭所及可以焚燬無遺即其木礮或為火箭射中亦可令其焚燬賊中素畏此項火器從前瞻對用之已有成效馬良柱所言或尚可採蓋賊酋所恃以抗拒天兵者以糧食不用外求今當此秋成賊糧露積之時施放火箭似可奪其所恃著傳諭訥親詳悉斟酌如屬可行即於成都城內製就解赴軍營應用近日軍情若何朕心懸念并令具摺奏聞山寒氣惡之區以

保身為要至馭軍之法雖應號令嚴明亦宜寬嚴
並濟惟知督責使令効命於死地而絕無慈惠愷
惻之思以及人則人孰肯用命哉必當集思廣益
合衆志以成城又朕所以命訥親前往者欲悉知
彼地及軍士實在情形也雖兩次奏報攻戰之事
而金川究係可取不可取及昔嶺賊隘之外復有
別徑可進取否此等總未奏及向聞川省綠旗兵
弱今果然否尚屬可用或不可用亦未奏及又用

間一事早有諭旨亦尚未覆奏以番攻番許之以
金川土地人民或者衆番合力取之亦未可知若
不可行則應速行奏明朕亦知軍中接一諭旨必
費許多籌算或反誤攻取正務但諸事旣未詳悉
奏報而大功又未速成何能慰朕日夜懸念耶故
不辭瑣言詳悉批諭其審籌細酌為之

壬戌兵部疏言前重慶鎮總兵官任舉統領官
兵進攻昔嶺石城身先士卒奮勇前驅乘勝追

殺以致鎗傷殞歿欽奉

諭旨令入昭忠祠以勵疆場用命之臣並

命臣部照提督例給與卹典臣等查照定例應請加

贈三級贈以署都督同知仍准廕子弟一人以

都司推用行文該鎮原籍地方將伊子送部引

見其應得祭葬臣等行知禮部工部舉行

上從之

丁卯

上命軍機大臣等傳諭訥親曰川省運糧一事前因紀山所定價值浮多傳諭詢問據稱官運米石定價每石十四兩七錢至民間雇夫出口每名每月俱有幫貼銀兩而官運軍米自出口抵營除支給腳價外每夫每站俱給口糧一升兩夫背米一石即以口外二十站勻算往回口糧沿途臺站已開銷米八斗是給軍之米大半耗費於運夫紀山所奏因此案乃伊自行陳奏之事不無飾詞回護未

盡確實若果屬實情則從前西北兩路軍營糧餉
浩繁程途遼遠其運糧腳費尚不至如此之多今
以本省之米轉運本省即令山谷崎嶇何至艱難
若此朕觀目下情形未能刻期奏凱宿兵既衆食
給殷繁長此不已何以為繼大學士訥親身行
間自必豫為籌及或事不能中止則籌兵必先籌
食或別有良法或如從前西北軍營之例令范毓
麟之子弟領資轉運可省官給之煩而於軍餉有

濟亦應早為計及可傳諭訥親詳悉妥酌速行奏
聞是日貴州巡撫愛必達奏言接准川陝督臣張
廣泗來咨以會勦金酋亟需幹員委用已檄調
銅仁協副將胡大勇來營聽遣此外尚須選派
勇幹歷練將備二三員飭令即日束裝赴營聽
候遣用臣隨檄行胡大勇遵照并經提臣丁士
傑揀選得黔省上江協左營遊擊田金玉丹江
營守備紀萬年長寨營守備李繁盛皆素稱勇

幹歷練軍務而督臣張允隨亦遴選田金玉并
選滇省東川營叅將紀麟昭通鎮標守備馬秉
祥俱勇往強幹歷練戎行已各檄飭速往聽遣
弁兵鹽菜口糧并應撥馬匹夫役皆飛飭地方
官先期料理隨到隨即支應前進以期無誤據
各將備呈報於七月初十五等日已經先後
起程理合陳奏奏入

報聞

戊辰

上以山東濟東道高越為四川布政使令速赴新任
已巳

上命協辦大學士事尚書傳恒傳諭訥親曰巡撫紀
山辦理金川事務與總督張廣泗甚不相合屢經
批諭訓飭終未釋然督撫各持意見在尋常無事
尚為不可何況軍務倥傯正當同舟共濟而川省
情形如此或係有意齟齬掣肘公事或因嫌隙既

開過事不能相下紀山才具本短但在滿洲大臣
中尚不失舊家氣象用為巡撫惟慮其被屬員欺
蔽若此番之情性乖張與督臣不合殊非意料所
及仍留川省恐於軍務無益可傳諭訥親令其詳
悉酌量或尚可調用別省或應行治罪以為剛愎
任性之戒俱著訥親一面據實奏聞一面傳旨令
其解任來京四川巡撫印務即著班第暫行署理
於運糧諸務呼應較靈當於軍務有濟再前次摺

到之後又幾二旬日夕跂望即七月十一日所批
發傳詢諸旨應行覆奏者除往返程途積日以計
亦應馳到何以遲遲若此深為懸繫訥親接到此
旨務將近日情形詳悉入告并遵照前此十餘日
一奏之旨迅速頻具摺奏以慰遠懷是日

上又命協辦大學士事尚書傅恒傳諭訥親班第張
廣泗曰四川布政使倉德於辦理藩司事務不能
妥協已補授太常寺卿令濟東道高越代之矣倉

德為人才具本短看來尚屬謹飭是以任為筦庫之司但如運糧一事係撫藩專責而此番軍需運脚繁費較之從前西北兩路軍營運費反屬繁多而人言籍籍猶以轉運為苦若非辦理未善何至於此在紀山倉德自未必侵肥作弊而兩人才情皆短或為屬員蒙蔽迴護已過俱未可知今倉德既經離任其有無欺蔽易於查察可傳諭訥親班第張廣泗等將伊任內經手諸事逐一確查據實

具奏若軍務倥傯無暇分心查辦則將此事專付
之班第俟成功之日再行詳查彼二人已皆離任
不能有所掩飾也

平定金川方畧卷九

欽定四庫全書

平定金川方略卷十

閏七月辛未訥親奏言褒卹任舉之

旨已通傳各營大臣將弁

臣

前議築碉之說實緣所

費無幾賊人堅守不出可乘其來擾得有掩殺
乃不得已而為之非藉此為制勝良謀今奉

聖明指示仰見

睿謨遠照第

臣

等又細加商酌目下雖無大成效每

因砌碣賊來侵擾得有斬獲亦不至有誤攻勦
就現在情形尚屬可行至王柔於六月初四日
到營始云尋覓漢奸前往間諜難保必擒賊首
久之終稱不得其人又欲祈請終南山道士用
五雷法以擊賊碣更為荒誕不經大約全屬不
識番情徒托空言而已昔嶺一路雖未能深入
直搗賊巢亦可將卡撒一帶橫截在外現在商
酌差人偵探山箐可截之路如可乘虛度越令

我兵裹帶前進以攻不備誠如

聖諭可圖破竹之勢也奏入

報聞是日訥親張廣泗會奏言伏讀

上諭以目今大兵已深入賊境設令膚功不能立奏
經秋涉冬彼地沍寒難駐又不得不營向陽和

暖之處相時再為籌畫伏查賊境目下雖當伏
熱之時並無酷暑之氣緣其地高處則寒低處
則暖陰雪則寒晴霽則暖故自山腰以下稍低

之區即向秋冬氣尚和燠雖值降雪亦不多存
我師仍可相機進攻若欲另覓駐營之地則自
出口以至軍營尺寸皆山實無地可以移營且
我軍已距賊巢不遠若一經撤退則險要盡失
賊必乘勢佔據官兵復取為難且恐士卒從征
日久一聞撤退之信必致渙散其心而各土兵
以為金川不能撲滅反與結好尤為可虞此臣
等所以未敢竟籌撤退也至

諭旨觀釁攻瑕賊衆所短何在有何隙可乘誠見

聖主洞徹兵機惟是金酋自知罪大惡極祇思固拒
以延時日所部番衆未嘗無投誠之意無如伊
等妻子皆為逆酋執繫巢穴是以不能潰散至
賊人天時地利皆其所長惟人數無多是其所
短統計賊番現存不過三千餘人再有損傷則
日見其少勢必不能久持是以現在頗多籲求
投誠者而逆酋自知罪重未肯而縛祇因屬下

番民傷斃甚多日向莎羅奔等懇求投誠以全身命而逆酋亦陽為懇求以安衆心是允降既於事機未協而賊境尚無瑕釁可乘惟曉諭以脅從固治渙散其固結之心并飭令各路將弁相機攻擊但能日斃數賊不使稍有休息又廢其耕牧之計目下已日食不繼將來必益無以為生可以坐待其斃以臣張廣泗愚昧之見度之今冬明春當不難犁庭掃穴矣而臣訥親以

為我兵果能奮勇爭奪數處賊必內潰然尚有
不得不為過慮者賊巢食用果否至於匱乏究
難臆揣而我兵攻勦以來一無可乘之機且卡
撒昔嶺二路尚係臣等親臨督戰乃僅攻撲數
次未得寸進朝夕籌商終無善策迨至冬寒春
冷士氣恐益不揚以臣訥親愚見如至冬間尚
然頓阻似應減撤久役漢土兵丁令留駐官兵
時用砲擊碉卡則賊亦不得休息俟明歲再加

調精銳官兵三萬厚集軍威於四月進勦則我
兵丁足以分布直搗掃穴犁庭最遲亦不逾秋
令如此既可節省糧餉又可少休輓運夫役至
糧運尤關緊要誠恐將來寒沍夫役背負維艱
臣等已飭行各路糧務道府等員倍加輓運務
於今秋大雪未降之前即將明歲三四月之糧
均行運貯附近軍營以免缺乏再臣張廣泗前
會同臣班第等奏請酌行商運之法現在商人

赴司領運者甚屬踴躍據報已有一萬五千石之數陸續起運出口將來日久愈多商運不竭庶可減派夫役以紓民力茲奉

諭旨令

臣

班第往來查察

臣

訥親隨即欽遵令其起

程并照會

臣

紀山速為查辦以安閭閻其附近

各土司久應夫役洵屬積勞然皆知大兵征勦原為伊等謀久遠安全之計現皆効力恐後並無怨望生心合并陳明是日訥親又奏言進勦

金川如秋間不能前進應先期籌畫加調官兵
厚集軍威業經臣與督臣另摺會奏臣再思來
歲加調官兵計增糧餉需費數百萬實屬浩繁
細察賊情若將我兵酌留萬餘名據守要害相
機隨時用砲攻擊賊碉使之不得休息其接壤
土司令各於本境自為防禦似狡寇亦能坐困
第久駐終非長策若俟二三年後再調集官兵
乘賊疲困全銳進搗自必一舉成功此二三年

內或有機會可乘擒獲賊酋亦未可定臣為民力

國用起見故計慮及此若以迅奏膚功而論仍不如臣另議明年接辦之可速捷也謹將所見一并陳奏伏候

聖裁奏入

諭曰此見非矣豈有軍機重務身為經略而持此兩議令朕遙度之理如能保明年破賊添兵費餉朕

所不惜如以為終不能成功不如明云臣力已竭
早圖歸計以全始終是日訥親張廣泗會奏言七
月十四以前各提鎮將領報到情形業經具奏
茲十四日以後黨壩一路自七月初一日至十
七等日共攻奪石卡二處用砲擊塌石土各卡
擊死賊番五十餘名甲索一路於七月初七八
等日殺死賊番十數名馬柰一路於七月初五
日擊死賊番數名昔嶺一路於七月二十日奪

得木卡三座旋經失去僅殺賊五十餘人卡撒
一路於七月十七至二十九等日奪獲水卡碉
房二座斬獲焚斃賊番四十餘人伏查河西四
路其馬柰一路僅可禦敵未能進取正地一路
因賊碉險密難進已將副將董撫遠調回卡撒
軍營甲索乃當二路駐彼日久毫無進取前經
檄留副將王世泰分兵駐守其副將高雄劉順
之兵盡撤并於昔嶺卡撤嗣又因該處道路叢

雜悉屬賊境要隘茲大兵減撤恐綽斯甲無所
彈壓心懷反覆則糧運經過或有疎虞是以僅
將劉順調赴卡撒至河東現止四路除納貝一
路原係牽制不進其黨壩一路總統提督岳鍾
琪設卡攻擊賊番雖頗有傷斃而康八達木耳
金岡之碉尚未能攻克前進卡撒一路所需調
并之兵尚未到齊查右山梁雙碉為色底巴郎
之屏障小金川土兵連撲三次未能即克現在

圍攻其右邊水碓二座已經奪據至昔嶺一路
原可深入直搗因有石城一座劄踞山嘴為賊
境咽喉前經開挖地道施放地雷穴中探聽不
準雖傷損賊人頗多而石城仍未能克現在飭
令另踴旁徑取路前進攻擊卡撒所調之兵到
齊即行飭令從左山梁取路前進並夾攻色底
俟一有克捷即當飛速馳奏原任提督段起賢
因昔嶺石城久攻未克於七月二十八日夜乘

卡撒官兵攻擊右梁雙礮水卡計欲親身臨敵督戰黑夜行至半途為鎗子所中並未損及筋骨尚屬輕傷易痊合並附陳是日

上命協辦大學士事尚書傅恒傳諭訥親張廣泗曰覽所奏軍營現在情形各摺幾於智勇俱困金川小醜不意負固難於勦滅遂至於此官兵攻撲進不能前退不能守即小小獲勝尚未傷彼皮毛何況批卻導窺得其要領以成破竹之勢奏內所稱

逆番來歲口食不繼可以坐待其斃我兵果能奮
勇攻奪數處賊必內潰又稱賊巢用度果否至於
匱乏究難臆度既云可以坐斃何又云究難臆度
始終迄無定見而所稱來歲增兵三萬是否能奏
膚功之處亦非確有所見必不可已之成謀夫兩
軍相持賊人無坐而受縛之理縱復窮幽絕險亦
無兵力必不能施之地既已用兵豈容撤退古有
裹羶絀險衣草自蔽種種奇策以成大功者獨非

於此等處施之乎今乃欲待其自斃自斃果有期
可待乎如果實有不能勦滅之勢何妨明言其所
以不能之故直請班師今又未能確指其必不可
勝而欲以三萬衆嘗試之為此無可奈何之說卿
等身在戎行目擊情狀尚不能確有成算游移兩
可朕於數千里外何從批示何從傳諭且大兵有
四萬之衆彼止三千餘人何以彼應我則覺有餘
而我攻彼惟慮不足日久懸望軍營消息而奏到

乃復如是殊非所料卿等可將實在情形或增兵
必可成功或用兵勢有不可詳悉審度歸於一是
迅速奏聞勿為兩歧之說要知閩外之事惟卿等
專責朕固不遥制也至逆酋佯請歸誠固不可信
然或因此離其黨羽攻其腹心亦可從中得間與
否亦並籌酌奏聞是日

上又命傳諭訥親曰朕前命訥親前往金川經略原
以一隅小醜大兵雲集不難犁庭掃穴速奏膚功

並籌善後事宜歲內可以回京今觀前後所奏一時難於克捷大學士心膂重臣諸務資其贊襄豈可久留遠徼即如所云須俟一二年後成功亦無在彼坐待一二年之理應即還朝辦事其經略印務令訥親酌量或交張廣泗或交岳鍾琪或交傅爾丹暫令署理聽其俟來春另調大兵再圖進取可即速奏聞候朕降旨至傅爾丹岳鍾琪俱曾統領大兵究屬老成宿將是以簡用於廢棄之中冀

於軍務有濟乃自到營至今未發一謀出一策親
在行間一若置身局外即內大臣班第烏爾登法
酬並帶往之侍衛等亦皆未見出力之處不知伊
等在彼所辦何事現駐何地殊非遣往之意可逐
一傳諭詢問是日訥親奏言臣查閱各路稟報多
有頓兵不進者商之督臣欲并兵合力督臣以
為地勢番情必當如此分布其實兵雖四萬有
奇分路太多在在勢微力弱而督臣之不肯遽

為歸併未免存回護之見也至其好惡每多不
公人心不能悅服即如叅劾貴州副將高宗瑾
進攻不能克獲尚屬兵家之常而其種種欺飾
則大干軍紀臣聞督臣於貴州官兵素有偏袒
是以未肯即行叅處致傷和氣適因昔嶺兵丁
乏員統領將該副將調往囑令督臣諄切訓誡
以期後效詎復將圍困賊碉之卡被賊人奪去
不能救援臣會商督臣奏請叅處督臣立稿僅

請交部察議經臣改擬革職督臣原稿轉歸罪
於甫經任事之叅將劉策名亦經臣更正具奏
其偏徇懦將輕重失倫如此又臣會同傅爾丹
將應援退怯之貴州千把等鎖拿乃該千把等
逃至昔嶺軍營高宗瑾知而不報督臣亦佯為
不知其袒庇劣弁如此又諸將備惟任舉實屬
奮力勇往身先士卒力戰陣亡督臣猶以為疎
於布置輕冒鋒刃今督臣布置月餘已極周備

仍不能督兵攻克是忠於王事者轉加以不美之名而干犯軍紀者偏欲為之脫卸此又偏徇不公所以不得人心者也至於用兵數萬攻勦經年賊酋本非勁敵路險亦非難至而所以不能速滅者蓋圖終必先謀始撫臣紀山於始事之時並未將糧運經由之山川險阻預立成算匆卒出師倉忙轉餉以致多用帑項經理周章糜餉之咎所不能免督臣張廣泗未能嚴督攻

勦曠日持久賊得乘間嚴密備禦故今歲加調官兵即從前已到之地轉不能復至且因分路太多而應進之路每苦兵力不足是則失於籌算昧於地形頓兵老師誠難辭咎臣奉

命經略理應叅奏但若此則臣與督臣勢難共事而歷練戎行又誠如

聖諭未有過於張廣泗者即撫臣經理糧運不遺餘力挽輸既無貽誤吏民尚屬相安亦難更易生

手臣之隱默未敢上瀆

宸衷私心竊計和衷共濟早靖蠻氛以紓

聖慮茲蒙

皇上訓臣以總挈大綱勉臣以廣資策力誠臣以自
執已見警臣以驅迫過嚴臣惟時刻敬守謹將

臣與督臣共事大端恭陳

聖鑒奏入

報聞是日訥親又奏言欽奉

諭旨調撥滿洲索倫兵丁應否如此辦理交臣定議

臣詳思軍營地勢不便騎兵弓矢亦無所用至於破碉攻卡在我滿洲索倫兵丁勇往之氣實較勝於綠旗但攻一碉樓須用奮勇兵一二百名在前又須數百名為後繼並須兩面埋伏兵數百名從前攻賊時皆因前隊已進後無應援多致貽誤今若令滿兵前進而以綠旗土兵為後繼恐伊等依舊遲疑不前則前進者不免受

傷如此一二次即驍勇者亦不免於退縮如全用滿洲則須得數千之衆費用既繁亦難得如許驍勇且滿洲索倫長於馬上弓箭此地無所施展至如何攻取破賊之處臣業已詳加籌畫另行具奏謹將滿洲索倫兵丁不便調用情形據實奏

聞奏入

諭曰數千滿兵之費用又多於數萬漢兵之費用乎

至所謂甚不可者則已知彼處地方形勢矣朕亦難以强行所詳加籌畫者亦不甚為得計又

諭曰今已因雲梯兵降旨詢問可一併再為詳議是日班第奏言口外輓運糧夫給與腳價口糧仰蒙

聖恩寬裕加給最為優渥較伊等平時民間傭值不啻倍增尚何至有擾累無如民間里下舊俗必資幫貼始肯應募歷來用兵皆所不免非止川

省此次用兵為然因其民俗相沿亦遂安於無事至若附近各土司連歲軍興供應夫役原不免於積勞然蒙我

皇上恩給價值並無苦累況伊等蠻民山多田少不敷口食向有遠赴內地下壩傭工者得此官給夫價優裕更非強迫惟瓦寺沃日小金川三土司部落稀少明正司則因瞻對之事甫息金川之役又興不無困憊臣與督撫二臣詳籌設法

或更換調減或添撥漢夫邇來較前已大減省
各土司皆恭順趨事並無怨望之形但念內地
里民幫貼雖實無多而或保長胥役借以科派
飽壑亦未可定茲蒙

諭旨垂訓臣即欽遵於閏七月初一日由軍營起程
前往內地詳加查察務期杜絕私弊以安閭閻
奏入

報聞

丙子張廣泗奏言五月初一日據疊溪營遊擊
阿爾占轉據武舉張鼎稟報四月二十九日傍
晚天降大雨至三十日四更時分忽然電光閃
爍雷聲震地將作固山頂漢兵營盤中戰礮一
座擊倒亂石壓死官兵及家奴共四十六人帶
傷官兵數十人又據經管火藥外委龔世榮稟
稱貯礮火藥十六籠盡被雷擊無存臣查番地
山高石厚陰雨日多番民所居礮樓時有雷擊

之事然從無擊倒者若果被雷擊倒則火藥自
必仍壓碇底何至原貯火藥無存明係弁兵疎
虞失火延燒故為捏報飭委龍安府知府等會
同嚴審確情茲據訊明外委龔世榮等供詞本
月二十九日天雨傍晚有值日看管碇樓火藥
之兵丁魏良棟王思賢二人口啣烟袋上碇看
漏回卡歇宿不料悞遺烟灰在火繩之上延燒
火藥十六籠以致轟倒碇樓壓死官兵魏良棟

等二人亦俱傷斃適值四更時分大雨鳴雷因而
控報雷擊除移咨提臣岳鍾琪查取失火各
官職名及傷斃各將弁人數另報理合先行具
奏奏入

報聞

丁丑訥親張廣泗會奏言各路官兵自閏七月初
三以前攻克碉卡業經臣等會奏茲查昔嶺
山梁石城一座為賊徑之總隘賊衆併力拒守

勢未能克因查昔嶺之下卡撒之右共有山梁
四道其頭道山梁已為我兵所據惟餘雙碕未
克雙碕之旁有水卡碕房二座亦經奪據日用
大砲攻擊雙碕但雙碕之旁有三層碕房一座
雙碕之下又有小碕石卡我兵雖圍不能嚴密
擬先發兵奪其三層碕小石卡則雙碕不難攻
取俟雙碕一克將昔嶺官兵一面留攻石城一
面酌分與卡撒右梁官兵合力攻取二道山梁

地名喇底奪據之後即由三道山梁直搗色爾力賊卡路更近捷臣等正在籌畫布置不意自初五日至今天雨連綿大霧迷漫現飭官兵預備齊全一俟晴霽即行分路撲攻臣等復查軍前各省官兵進攻日久傷病者多俱經陸續遣回內地調養征兵缺額過多就近於川省續調兵丁二千名赴營補額已報到數百名又甲索乃當二路之兵日久未能寸進已將副將劉順

高雄檄調歸併卡撒止留王世泰帶領川兵千餘土兵數百名勢覺孤懸既不能進取亦不能彈壓綽斯甲現據提督岳鍾琪屢以兵單為詞因即將王世泰所領官兵飭令就近歸併黨壩約計調撤劉順高雄二將之兵共有二千餘名與川省未到補額兵丁千餘名均在本月半間可抵臣等卡撒軍營一到即當遣往卡撒左山梁地名普膽該處有賊碉數座一面督兵攻擊

一面分兵直從左山梁壓下與右山梁官兵對峙合圍則色底賊人左右各礮皆在圍困之內諒賊亦難踞守也奏入

諭曰此次所奏撤無用之兵并力攻勦實合機宜雖目下尚無大捷而調度有方用是稍慰是日訥親張廣泗又奏言馬良柱於上年攻克孫克宗之後即由彼取路直抵丹噶劄營並分兵駐守曾達所有該處軍糧即係派雇孫克宗番民輓運

臣張廣泗極力督催始得勉強接濟惟是缺糧之際兵丁日給食米一升尚有支食餘存及買易人等售賣炒麵食物等類尚未竟至枵腹至馬良柱所稱煮食皮鎧鞍韉則此番征兵皆係步戰未帶馬匹焉有鞍韉若皮鎧則軍中更未攜帶何從煮食此支飾之詞也且丹噶缺糧數

日乃在馬良柱軍營未撤之先迨至將撤之際則糧已運到并有輓運在途尚令運回者馬良柱實緣畏賊襲迫因遵指授遑遽撤退以致軍裝砲位遺棄頗多非關缺糧之故至於上年糧運總因籌辦未善惟黨壩與小金川兩處尚不至缺糧其餘臺站因概用本地番夫烏拉並未派調內地漢夫一名領運故阻糧不但曾達丹噶為然即南路總兵許應虎初駐正地繼至甲

木的交并副將張興駐劄之馬邦以及西路之
卡撒各軍營俱有缺糧至數日旬餘者臣因川
省文員狃於積習悖謬之處甚多即於臣張廣
泗一切教誡皆固聽從欲叅則不可勝叅幸蒙
聖明照察

欽差尚書班第來川督辦並奉

嚴旨訓飭撫臣紀山始行添調漢夫多方設法復蒙
特命臣訥親來川經略加緊飭辦現在軍糧乃得供

支無誤其從前辦理遲誤之大小各員均難辭咎查籌畫不善派調糧夫不足則係臣張廣泗巡撫臣紀山前任布政使李如蘭現任布政使倉德督率不力西路則係總理松茂道唐進賢副總理保寧府知府周岐南路則係總理原任建昌道陳緯副總理原任打箭爐同知鮑成龍專辦丹噶曾達卡撒糧運遲誤之員則係署汶川縣知縣劉士縉專辦正地甲木的交馬邦糧

運遲誤之員則係榮經縣典史嚴惟寅瀘州嘉
明司巡檢王洪德仰祈

勅部一併嚴加議處奏入

上以張廣泗身在軍營辦理軍務自難兼顧糧運免
其議處餘俱

諭部嚴察議奏

臣等謹按糧餉為軍營所最重張廣泗目暗
軍營缺乏者已數處隱忍者幾一年並不據

實叅劾以肅軍紀乃至

皇上特命班第前往督辦又

命訥親前往經略查察既周

嚴旨屢降自知無可掩飾然後具摺糾叅其前此之

辦理疎忽固難辭咎而有意徇隱更為罪無
可寬矣我

皇上以軍旅重大寬其罪正所以責其成既已格外

承

恩自應竭誠報

國而玩愒因循惟事欺詐其能逃於

聖明之鑒察乎

是日訥親奏言馬良柱移營缺糧一案臣遵查

卷宗本年正月初八日馬良柱報稱丹噶兵丁

缺糧八九日隨營支放把總李明傑呈報自正

月初一日起至十二日止缺少官兵口糧六七

日不等又十一十四等日馬良柱報稱曾達缺

糧四日至七八日二月二十日馬良桂稟稱
撤兵時夫役兵丁缺糧一十五日俱有卷案可
查又前隨馬良桂在營之弁兵有現在臣營駐
劄之把總李玉資外委廖雲詢據伊等稱上年
十二月十三四日前往領米因糧運雪阻未得
領回此後各營俱不能按期領米將所餘之米
衆人分食或得一碗或得半升惟撤兵前營中
缺糧二三日別營尚有多缺幾日者或刨圓根

或它野菜根療饑或賣衣買食後到孫克宗地
方始補給半月口糧臣細核呈稟及詢問弁兵
情詞缺糧日期叅差不一然大約缺乏屬實理
合陳明至雲梯兵數百名不敷攻撲之用若至
數千名則糜費繁多今擬於卡撒一路將可以
圍攻之處用兵圍守奪其糧水可通之路又賊
番人少其與我兵相拒之碉卡既已悉衆拒守
則其內必虛應伺其不備乘虛襲取或從林菁

抄出其後庶使賊首尾不能相顧量度漢兵派遣圍攻尚堪驅策至於偵探路徑於林密菁深之處若選長於步履熟習鳥鎗之侍衛官員兵丁數百名分隊率領相機躡探自能攀越前進冬春積雪深厚勢屬難行倘來歲夏間尚須增兵繼進則於明春陸續遣發來營令率漢兵同進似屬有益其馬良柱所稱斷絕糧水圍困賊衆年餘之功賊必立斃臣查金苗地勢有可圍

困者有必須攻取者亦有應抄前截後斷其聲
援者并有應聲東擊西避實攻虛者種種情形
不一若必并金酋之境而全圍之則自去歲至
今已有年餘曾未見有成績賊人食用有資何
由使之立斃又據稱此時若行撤兵則已得之
地必復被賊侵佔此固早已慮及但體察各處
情形尚非緊要路徑若至冬間原屬可守可撤
惟卡撒昔嶺黨壩三路則係進攻要隘不可撤

兵讓地又據稱瓦寺頗有二心臣查瓦寺地方
與汶川縣聯界臣蒞軍營經過其地該土司謂
見極為恭順現派兵夫應役亦未見別有二心
惟聞上年馬良柱初進兵時調伊番兵隨征與
金酋對陣有止放空鎗之語今瓦寺之兵即在
臣現駐之卡撒劄營細察別無他故奏入

報聞是日

上命協辦大學士事尚書傅恒傳諭訥親曰據奏選

擇長於步履習熟鳥鎗之侍衛官員兵丁數百名
令其分隊領兵偵擇路徑朕現在特派大臣揀選
精壯滿兵三百名演習雲梯即令伊等兼習鳥鎗
俟其熟練之時再選擇侍衛等於明春帶領前往
以備率領官兵進攻之用傅爾丹及班第烏爾登
等現在軍前何以並未見伊等督戰出力即成都
派往之滿兵一百名亦未見其作何赴戰以理揆
之或由任舉之變恐冒險直前有意外疎失不令

伊等對敵亦未可定夫兵以克敵為勇若護惜而不令其摧鋒陷陣則命伊等前往之意謂何我滿洲舊習不應有此傳爾丹身經百戰何未受傷此亦有命耳如果能奮勇先登正伊等見長之地豈肯瞻顧不前如此可知並非伊等退縮必係訥親過慮而不令前進也可將此旨傳諭伊等又革什咱與金酋世讎或許以重賞令其設計擒獻但須確有斬獲憑據毋稍留疑竇貽後來之患朕觀訥

親等及軍士皆不無畏難之意則今歲斷不能成功矣其應添兵再舉或應緩期待釁此時或另已籌有長策可畫一定議速行具奏

庚辰

上諭內閣曰原任重慶總兵官馬良柱雖經獲罪但朕觀其人材與庸懦無能者有間在綠旗將弁中猶為強幹之員伊獲罪情節尚可原宥且在川年久於番地情形頗為熟悉著仍發往金川軍營交

經略大學士訥親總督張廣泗以副叅等官酌量
委用効力贖罪是日

上又諭內閣曰據紀山奏稱瀘州士民周其睿等連
名具呈以伊等荷蒙皇恩休養生息連年豐稔前
歲又逢蠲免條糧無由報稱伊等十鄉士民情願
辦米五千石交倉以資積貯川省連年用兵一切
輓運糧糈雖寬裕給與價值未免有資民力朕心
方切軫念斷無復聽其捐輸軍米之理紀山之為

此奏其見益鄙但士民既已爭先交納若仍令領
回轉需運費且阻子來樂輸之情著將此項捐辦
米石抵為下年應完正項錢糧是日紀山以欽奉
諭旨申飭辦理糧運不能覺察科派具摺請

旨嚴加議處

上諭該部嚴察議奏

平定金川方畧卷十